

**ECONOMIE**

Il Dipartiment di Siencis economicis di Udin cjapât intune iniziative europeane.

## Un progjet pes piçulis impresis

Judâ lis impresis piçulis e mediis, e lis istituzions che lis rapresentin, a fâ sinti la lôr vòs intal dibatiment su problemis complès tant che il smaltiment dai refudums, il sparagn energetic o la gjestion dal trafic. Al è l'obietif dal progjet di ricercje european "Small and medium enterprise deliberative engagement" (Partecipazion deliberative pes impresis piçulis e mediis), assegnât a un consorzi public-privât che al cjape dentri, pe Italie, il Dipartiment di siencis

economicis e statisticis de Universitât dal Friûl, e i ateneus di Aarhus (Danimarce), Dubrovnik (Cravuzie), Leeds (Ream Unit), il Comun di Stoccolm (Svezie), une agenzie di disvilup di Varna (Bulgarie) e altris membris privâts. Il progjet al è finanziât par 379.000 euros in dut, di chei 76.000 a son pe Universitât dal Friûl, dal program comunitari "Life-long learning" (Aprendiment continui) e al à une durade di 30 mès, di Otubar 2013 a Març 2016. Il coordinadôr de iniziative pal

ateneu furlan al è Luca Brusati, responsabil scientific dal Laboratori di ricercje economiche e direttive. "Su la fonde de evidence empiriche che i compagns a racueiaran intai diviers Pais coinvòlts, il consorzi al destinarà un manuaâl e un program di formazion pensâts par judâ lis impresis piçulis e mediis a passâ la logjiche de contraposizion - al sclaris il professôr Brusati -. Il supuest al è che impresis e associazions di categorie a puedin cjatâ soluzion ai problemis leâts ae

sostignibilitât intal tiermin medi e lunc dome confrontantsi cui lôr interlocutòrs e metint in cjamp soluzions condividudis". "La valutazion ecelente otignude de nestre propueste - al evidenzie il diretôr dal Dipartiment di siencis economicis e statisticis, Andrea Moretti - al à ricognossût la rilevanze e il caratar inovatif dal teme, lis competencis complementârs dai sogjets impegnâts e il valôr de ufierte formative su misure che il progjet al vûl disvilupâ. Ancjemò une volte la Universitât dal Friûl e



dimostre la capacitât di balançâ la partecipazion a iniziativis di respir european cul aprofondiment des problematichis che lis impresis dal teritori a àn cumò".